

NDJEKËSIT E ENIGMAVE

---

ADEM ZAPLLUZHA

# NDJEKËSIT E ENIGMAVE

Redaktor:  
Arsim Halili

Recensent:  
Mazllum Baraliu

lektor:  
Arsim Halili

NDJEKËSIT E ENIGMAVE

---

ADEM ZAPLLUZHA

# NDJEKËSIT E ENIGMAVE

Shoqata e Shkrimtarëve  
“Fahri Fazliu”  
Kastriot, 2014



**Arsim Halili**

## **PARATHËNIE**

### **Hyrje**

Në itinerarin krijues poeti Adem Zaplluzha, pa dyshim se tani më ka një formulë, për të cilën gjë mund të themi se është me një polivalencë ndjenjash krijuese. Ai niset në cakun e duhur, jo për të kërkuar të pagjeturën, sepse tani më e ka të gjetur atë që është enigmë. Me ngulm kërkon ta modifikoj, si të qenë, kur diç është abstrakte në kozmogininë e ideve të tij. Por tani mund të shtrohet edhe pyetja :

- Kush është në kërkim të enigmës?

Poeti apo dikush tjetër. Sigurisht se poeti Adem Zaplluzha , nuk është më në ankth për asnjë gjë tjetër, poeti në trajektoren e tij krijues riaktualizon dhe modifikon motivet , për të cilat edhe ai vet në këtë kapërcyell të moshës së tij i ka nuancuar me gjuhën poetike aq shumë lirika, ku secila veç e veç thotë diçka, porsi tërësi thonë një gjë, se ai shpreh rebelim poetik ku sinjifikatiteti i gjithë asaj që shkruan është gjuha e argumentit, gjegjësisht letrarizimi përballë të përditshmes dhe të

përhershmes, të imagjinatës dhe realitetit, të individuale dhe universale. Nga një kënd në tjetrin, ndjek me kujdes ligjërimin poetik, jo patetik dhe të absorvuar, por gjithnjë në konsistencë me të sotmen dhe të arsyeshmen. Lexuesit i ofron vargun në variacionin e tij shprehimisht të kapshëm me nuanca figurative stilistike, gjithsesi këto lirika tek libri “ Ndjekësit e enigmave” i transponon me kulturë shprehëse krijuese.

### ***Rebelimi dhe racionalizmi i vargut***

Kur e lexon librin “ Ndjekësit e enigmave”, në një moment do të ndalesh dhe të pyesësh vetën, po në cilën situatë momentale është poeti. Komunikimi i natyrshëm por edhe divergjent mes hapësirës kohore dhe hapësinore e që me ndjeshmëri e shfaq me diskurs faktik, porse mund të themi paksa emocional, më së miri këtë e ndeshim tek poezia e tij

Fq5 Ku interkomunikimi është dy vetor në poezinë  
“ Ti qëndrove stoikisht”  
“ Unë tani jam i moshuar  
Thinjat po rëndohen si shirat  
Mbi kokën time  
Ti ende ke mbetur lulebora  
E paprekur deri në skajshmëri”

Natyrshëm dashuria mbetet prorre e freskët, qoftë ndonjëherë edhe në ikje. Poeti shihet se është mjaft dinamik dhe evoluese, ai drejton gishtin kah tjetri, jo për të marrë atë që nuk është e nevojshme, por që në parantezë e lidhë edhe dashurinë edhe marrëdhënien ndër shoqërore dhe kjo natyrisht është edhe dhënie edhe marrje, ndaj duke qenë peng i fjalës së dhënë. Këtë distribuim e shpërfaq përmes poezive “ Ishte kohë e fjalëve”, “ Fol “.

“Me qindra herë

Deshëm të jemi vetvetja jonë

Dhe askurrë nuk u bëmë hije” ...

Poetin Zaplluzha, në ekuilibrin kohor, sikur e tërheq partitura të diagonaleve të cilat shpërfaqen disi me sklerozë të së djeshmes që deshëm ose jo është një barometër identitar të traditës nëpër kohë, dhe droja e poetit është e arsyeshme, sepse ai me ngulm kërkon të jemi vetvetja e jo imtues diçka të huaj. Më së mirë poeti këtë e thotë përmes fjalës poetike tek poezia fq **21 “ Ishte dita”**. Deri sa lexojmë përmbledhjen poetike “Ndjekësit e enigmave “, vërejmë se poeti etablon narracionin e tij poetik, edhe për nga aspekti fabulativ si p.sh tek poezia “ Mushkonjat “ose edhe tek poezia “ Te kambanorja” . e të ndonjë tjetër, gjithnjë duke qenë

atakues me realitetin disproporcional me shpirtin poetik të tij dhe meditimin pozitiv kundruall kërkesës së një jete më ndryshe në bio-ritmet, jo vetëm në margjinat individuale por universale. Siç edhe cekëm më lart poeti duke qenë i vetëdijshëm se liria qiellore me atë tokësore kanë disonanca, jo vetëm konfigurative, shprehimisht poeti implikon në fjalorin e tij poetik figura stilistike të cilat i metaforizon në kontest metrik të vargut, por edhe artistik e estetik. Ajo çka më bie në sy poeti ndjesinë e tij poetik përdorë variabla psikologjik, që qartëson rebelimin e tij ideo-emocional, por gjithnjë në kontest të racionalizmit të asaj që për poetin ka ndonjëherë edhe anën diskutabile me realitetin e krijuar.

### ***Në vend të përfundimit***

Nga gjithë ajo që mund të lexohet në përmbledhjen poetike “Ndjekësit e enigmave” shihet se është e ndërtuar në bazë të një parimi të ndërgjegjësimit, për të gjetur të pagjeturën, ose për të profilizuar shikimin ka një e vërtet ndryshe, që deshëm ose jo shpesh herë di të jetë lojale me jetën tone. Andaj poeti me shpirtin e tij rebelues, është edhe emocional sepse para së gjithash ai çmon dashurinë ndaj tjetrit, lirinë e të menduarit ndaj tjetrit, pa i



cenuar asgjë më shumë dhe më pak se ajo që është e imja, e tij, ose e saj, kjo mbase edhe e racionalizon edhe vargun edhe mendimin e tij në vargun e tij plotë elasticitet artistik.

*Preshevë, 29 tetor 2013*



*Ecnin edhe yjet pas saj  
Cikli i parë*



## TI QËNDROVE STOIKISHT

Të kujtohet  
Sa herë që kemi biseduar për dashurinë  
Binte një shi imcakë  
Te mjegullat e dendura  
Një meteor e kishte humbur rrugën

Unë tani jam i moshuar  
Thinjat po rëndohen si shirat  
Mbi kokën time  
Ti ende ke mbetur si lulebora  
E paprekur  
Deri në pa skajshmëri

Kjo jetë sa e rënd po aq edhe lumtur  
Vrapon si dreni nëpër korie  
Ti lule shiu në kujtesë  
Asnjëherë  
Nuk abdikove në fronin e dashurisë

Çmendurisht dashurove jetën  
Të kujtohet fare mirë  
Kur e mbollëm plepin e parë  
Ishte një ditë  
Që vetëm ashtu mund ta krijoj hyji  
Ditë me shi të bollshëm  
Në flokët e dendura të çasteve hyjnore

## **DEGËT U BËN SHPIRTRA PEMËSH**

Ishte një rrugë e gjatë  
Brenda nesh  
Rritej një lloj bari mijë fletësh  
Me të cilin  
I shëronim zogjtë e plagosur

Atë ditë  
Filluam prej një asgjëje  
Që në fillim e mbollëm fjalën  
Degët u bën shpirtra pemësh  
Dhe lëshuan rrënjë  
Në dunat prej ere

Patëm edhe vite të humbura  
Prej përrallave  
Dolën disa enigma  
Dhe filluan të lëshojnë lastarë  
Në shpirtin  
E një peme të shenjtë

Dikur kah mbrëmja  
Gjethet ranë për toke  
Si brishtësia e viteve të mia  
Ti qëndrove stoikisht  
Asnjë furtunë nuk t'i shkuli rrënjët

## ISHTE KOHA E FJALËVE

Me qindra herë  
Deshëm të jemi vetvetja e jonë  
Dhe askurrë nuk u bëmë hije  
Një gur i rënd i fatit  
Qëndronte mbi kokën e vrarë të gurit

Ishte koha e fjalëve  
Kur u krijuan ato ne ishim  
Diku në fund të vetvetes sonë  
Kur dolëm në rrah  
Më nuk binte shi në përrallat e fëmijërisë

Ecëm si somnambul  
Kishte edhe ditë më të këqija  
Kur nuk binte pikë shiu  
Në dhembjen tonë  
Si t'i shërojmë plagët  
Kur ato  
Akoma pikojnë trishtim

## **FOL**

Mos rri ashtu e heshtur  
Fol  
Trego diçka  
Për prejardhjen e pemës  
Këto degë që çelin dashuri  
Rrënjët i kanë diku në hapësirë

Ti hyre në mua  
Si një mysafir i paftuar  
Të kujtohet  
Me ardhjen tënde erdhën edhe fjalët  
Deri atë ditë  
Unë i përngjaja arkivolit

Fol  
Mos rri ashtu e heshtur  
Më thuaj një fjalë  
Që shëron dhembjen e gurit



2.

Më thuaj diçka  
Që s'kam dëgjuar deri më sot  
Pema e jote po lulëzon  
Disa lloje të tjera pemësh  
Ky shartim me barin  
Po i ngacmon fluturimet bletëve

Mos heshtë  
Më thuaj diçka të mençur  
Të mos i përngjaj arkivolit  
Prej shimshiri  
fol të lutem mos heshtë

## **NJË TRËNDAFIL I ZI**

Një milingonë e kuqe  
Si një kafshë e madhe parahistorike  
Rendte kalldrëmit tërmal  
Rendnin si të çmendur  
Edhe rreshtat e arkivoleve

Ky procesion i gjatë prej druri  
Po i përngjan bishtit të një gjarpri  
Dita e plagosur me nëntë plagë  
Zvarritet udhëve të liga  
Si zvarranikët e sëmurë ngjashëm buajve  
Rrëshqasin njerëzit kalldrëmeve

Një trëndafil i zi  
kush e di se nga kush  
Kishte huazuar  
Një ngjyrë tjetër alternative  
Dhe shkërmoqej së qeshuri  
Me gjethet që kalbeshin nëpër degë

Rrënjët mbetën pa metafora  
Mbi qepenat e dyqaneve  
Flinin zogjtë endacak

Një nënë sa e madhe  
Po aq edhe moshuar  
Këndonte një ninullë të lashtë  
E cila për herë të parë  
Dëgjohej në qytetin tonë

*Prishtinë, 04 korrik 2013*

## **FURTUNA MBI NJË ARKIVOL**

Për një gotë ujë  
Përpëlitem nëpër ninullat e fëmijërisë  
Një zog i vetmuar  
Deri në ashtë ndjen dhembjen time

Nata këndon si qyqja  
Nëpër shpirtin e degëve të braktisura  
kalojnë kolonat e milingonave

Gjethet marrin frymë si të ishin të sëmura  
Prej degëve të shkërmoqura  
Pikojnë trishtimet e një nate  
Kurse shiu si i çmendur troket  
Në xhamat e gurit të dërmuar

Karvani nuk kishte të ndalur  
Depërtoi deri te frymëmarrja e rrapit  
Furtuna mbi një arkivol  
Për herë të parë qante me ngashërim  
Nën degët e lënduara të kujtesës  
Ka kohë  
Që digjet njomësia e barit

Mos iu afro vetmisë  
Ky stol sot po qanë si një foshnje  
Ikën njerëzit nga qyteti im  
S'paska mbetur më askush këtu  
Vetëm një grua e moshuar  
I mëkon dhembjet e strallit

## KUJTOVE SE IKJA E KUJTESËS

Mbase ece si pa kokë  
Deri te ëndrra jote pagane  
Në fund të rrugës  
Befas doli një tjetër fund pa shije

Ngjyra e portokalltë e diellit  
Ethshëm pi ujë  
Në lotin e kristaltë të vesës  
Një diell i ri sot po lind në qiell

Kujtove se ikja e kujtesës  
Ishte vetëm një rastësi  
Në rrathët e mjegullave  
Asnjëherë nuk i pamë shirat

Kur erdhe t'i mëkoje kujtimet  
Ti ishe diku shumë larg  
Jetoje përtej rrugës së ylberëve  
Dhe kurrë më nuk u ktheve  
Në përrallën e gjelbërimit të vesës

Unë mbeta mes dy zjarreve  
Dy fate prej kashte më ndiqnin  
Deri te etja ime pagane  
Dhe atë ditë erdhën zogjtë pretarë  
M'i morën ëndërrt e ninullave

## KUR ZBRITËN FLUTURAT

Ecëm deri në fund të rrugës  
Asnjë flutur nuk fluturonte çative  
Kur u pamë me rinjohjen  
Nga komçat e këmishës së grisur  
I këputëm të gjitha nyjat  
E penjve të mëndafshit

Një krimb  
Si një kafshë gjigande  
Galoponte nëpër kujtesën e manit  
Asnjë udhëtarë i vonuar  
Nuk erdhi mbrëmë te hani  
Ku çatitë këndonin një baladë të lashtë

Kur zbritën fluturat nga majat e lisave  
Një diell i ri për herë të parë lindi  
Prej ngjyrave të ylberit  
Atë çast mbi gjelbërimin e paanë  
Prej vesës së mëngjesit  
Binte një shi i kristaltë

Një hije mbase ishte e padukshme  
Por ne nuk pamë  
Se si ajo rrëshqite nëpër mistikën e erës  
Gjethet mishngrënës u shndërruan  
Në disa lloje të kafshëve parahistorike

## **MË PRITNI**

Brenda nesh si ajo fije kashte  
E lindur nga legjenda  
Lindin metaforat e shirave  
Një dunë prej fjalëve  
Herë zhduket  
E herë çelë si lulja nga trishtimi

Ne do të vijmë një ditë  
Do zbresim si shirat nga yjet  
Ndoshta do i përngjajmë meteorëve  
Ose fluturave të bardha  
Por domosdo  
Duhet të zbresim si jashtëtokësorët

kur të takohemi  
Mos mendoni se asnjëherë  
Nuk isha në mesin e juaj  
Unë jam njëri prej jush  
Që ecën me hapa të sigurta  
Deri te portat e ringjalljes

Më pritni  
Një ditë do paraqitem  
Si një vegim i harruar  
Kurse ditën tjetër  
Ndoshta do i përngjaj gjelbërimit



## **KUR NJERËZIT I ÇELËN SYTË**

Si vezët e ngjyrosura të pashkëve  
Dola nga mistika  
Një kambanë e harruar  
Që s'i dihet as koha  
Qante te murishtat e kambanores

Më duket se ishte një golgotë e madhe  
Asnjë flutur e manave të kuqe  
Nuk kishte çelur larvë  
Mëngjesi atë ditë  
Dëneste te një kryq i harruar

Pak më vonë një njeri i dehur  
Mbase ishte endacak  
Në lëndinën e lotëve i lante mëkatet  
Dhe një kohë të gjatë  
Bisedoi me një kryq prej gjaku

Më duket se ishte hera e parë  
Kur njerëzit i çelën sytë  
Mbase edhe u zgjuan nga letargjia  
Dhe kurrë më  
Nuk i zuri gjumi shpirtrat e lisave

## KY BALSAM SHËRUES

Kjo siluetë e gjelbër  
Që ecën nëpër lotin tim  
Me sandale të kuqe  
Sa shumë po i përngjan gjakut të erës  
Sa që si fryma e mirë  
Zhytet thellësive

Dje ishte një tjetër ditë  
Nuk i përngjante ditës së sotme  
Qeshte edhe deti i dehur te një varkë  
E fundosur në shpirtin e peshkut  
Një lloj vere të kuqe  
Shtrydhte rrënja e barit

Ishte koha e një kohe kur lindën fjalët  
Nga mollëzat e lisave pikonte rrëshira  
Ky balsam shërues  
Ose mbiu nga mjegullat  
Ose nga shpirti i dehur i një meteor  
Një kohë të gjatë  
Po i shtrydh trishtimet e gurëve

## ECNIN EDHE YJET PAS SAJ

Mbrëmë një errësirë e trishtë  
Ecte trotuareve të katandisura  
Prej xhamave të thyera  
Ecte edhe mëkati me hapa somnambuli  
Njërën këpucë e mbante në dorë  
Kurse tjetrën në këmbën e djathtë

Ecnin edhe yjet si vargan milingonash  
Një zog i verbër fluturonte prej një dege  
Në tjetrën degë  
Të lëshuar deri në tokë  
Asnjë njeri s'dukej në horizont  
Vetëm një qiri i kyçi të gjitha dritat e yjeve

Hëna mbi një varkë prej letre  
I përngjante sfinksit të karbonizuar  
Nëpër shpirtrat e mjegullave prej merimange  
Me ngashërim dëneste kujtesa e një kafkulli  
Dëneste si një kalama i trishtuar duna e rërës

Kur me zogjtë e ikur dolëm në rrah  
Një freski gjethesh të njoma  
Filloi të derdhet fushave të paanë  
Lejlekët erdhën dikur vonë  
Vjeshta veç kishte veshur  
Pallton e gjatë të një trishtimi

## UNË DHE TI JEMI AI

Unë vij deri te ti  
Ti ikën si një zvarranik  
Mbase atij tjetri  
I mbetet vetëm kujtim

Sa herë që takohemi te delta  
Një gotë ujë derdhet në misterin e honit  
Unë vij  
Ti ndoshta as që je nisur  
Kjo rrugë e gjatë kurrresi nuk përfundon

Unë dhe ti jemi ai  
Që shkon deri te arkivoli  
Hija kthehet në vetvete  
Dhe tërë kohën mediton  
Për një sekret  
Që asnjëherë nuk ka ekzistua

Unë vij  
Ti vjen ose ai shkon deri në Ferr  
kështu në këtë gjendje  
Të pakontrolluar  
Nën urat e qytetit të zambakëve  
Rrjedh e kaluara  
Dhe e ardhmja e lëngët

## ISHTE DITA

Sot nuk po më pëlqen  
Trajtë e erës së mykur  
Dje ishte një ditë  
Pakëz më ndryshe se kjo  
Ishte dita  
Që nuk i përngjante asgjëje

Nga Bjeshkët e Nemuna  
Dëgjohej zëri i një lahute  
Ndoshta era këndonte një psalm të vjetër  
Ishte koha e rapsodive  
Për herë të parë kënduan vashat e malit

Sot sërish pa kurrfarë trajte  
Po më duken duart e rrudhosura të lisave  
Një baladë e vjetër prej gjetheve  
I kishte humbur ëndrrat e rrënjëve  
Që çelnin do zogj shpresash

Kur i humba fjalët në mua mbetën  
Dhëmballët dhe gjuha e trashë e fjalës  
Disa palë opinga mbaruan atë ditë  
Mjeshtrit e sandaleve të kuqe  
Dhe kurrë më nuk eca zbathur

*Prishtinë, 05 korrik 2013*

## **FLINIM SI KUAJT E LUFTËS**

Po që se na del kllapia  
Si mund të mos mendojmë më esëll  
Për ngjyrat e etjes

Pasi që u larguan shirat  
Ne hymë në një tjetër kohë  
Në kohën  
Kur zgjoheshim  
Si zogjtë e ikur nga mendja

Prej të gjitha atyre telasheve  
Të uljes  
Dhe të zbritjes së temperaturave  
Kllapia si një alternativë e dytë  
Rrinte ulur  
Në stolin e fëmijërisë  
Dhe na përqueshte  
Derisa e ndjenin dhimbjen në asht

Ne asnjëherë nuk u përmirësua  
Ecëm prej një gabimi  
Në tjetrin

Flinim si kuajt e luftës  
Duke i kafshuar mëgojëzat  
Pimë ujë te mjegullat e turbullta  
Dhe askurrë nuk patëm kohë  
Të mendojmë pak më ndryshe

## **TI I PËRNGJAN PEMËS**

Ti zbret deri te vorbullat e përgjumur  
Të rrënjëve  
Kur të del përpara makthi  
Nata i përngjan armikut  
Si portat e urrejtjes  
Hapen sytë

Hapet edhe ndërgjegjja  
Asnjë deriçkë më nuk rri e mbyllur  
Vetëm qepallat shndërrohen  
Në pluhur plumbi  
Ti i përngjan pemës  
E cila i ka humbur  
Të gjitha gjethet e njoma



## TE FUNDI I BETEJËS

Mes ngjyrave të dritës  
Një interval zmadhues rri te honi  
Rri dhe përgjon sterrën  
E cila i përngjan ushejzës

Dikush nga një thellësi e padukshme  
I zgjatë duart  
Bleta krahë thyer fluturon  
Përtej dritës  
Deri te syri i verbër

Kudo errësirë e pamat  
Nën qepallat e breshrit  
Një këndes i egër  
Për herë të parë  
E zgjon mëngjesin  
Në kryqet e atdheut luten endacakët

Një trëndafil i zi mbeti pa aromë  
Asnjë lule molle  
Nuk çeli në mendjen e lëndinës  
Kuajt e luftës i kafshuan dizgjinët  
Te fundi i betejës  
Për herë të parë filluan të duken  
Ngjyrat inkandeshente të gjakut

## KY DUET PREJ MJEGULLAVE

Një njeri  
Mbante në dorë pëllumbin e egër  
Kurse pëllumbi  
Një zarf të kaltër prej lotëve

Era qante te mjegullat e plumbta  
Hapësirave të paanë vraponin  
Meteorët endacak  
Si për çudi pran shatërvanit  
Qante edhe një zog i vetmuar

Ky duet prej mjegullave  
Dhe zogjve të egër  
Mbase sontë do vallëzojë  
Valsin e pa vallëzuar deri më sot  
Te shatërvani  
Sërish era pinë ujë

Kalaja ëndërrimtare  
Me nostalgji të padëgjuar  
Bënte pjesë në këtë kor  
Gurtë dhe lisat  
Si kurdoherë më parë  
Hynë në procesionin e lotit  
Dhe të këtij vallëzimi të lashtë pagan

## SI YJET E VERDHA

Çdo gjë sonte po më duket  
Si kjo hënë  
Qenkan të largëta gjërat  
Të pa prekshme  
Si yjet e verdha  
Mbase edhe si ëndrrat  
E mija të paarritura

Më duket se akoma sot vrapoj  
Si kukullat e grisura  
Dhe me kalin tim prej druri  
Tërë kohën e lume  
Hingëlloj si shirat  
Dhe dënesi  
Tok me një kafshë të madhe

Sonte qenkan të pakapshme yjet  
Asnjë serenatë  
S'mund t'i zbres në tokë  
Ky kor prej bretkosave  
Kurrsesi të ndalet

Deri në rrënjë  
Po kallen gjethet e shelgut të pikëlluar  
Derisa zogj shtegtar  
Dënesin si kalamajtë e braktisur

## **E PAMË EKLIPSIN E HËNËS**

Në çastin kur parasheh  
Se si pëllumbi i egër  
Kthehet në çerdhen e vetë  
Kurrë më mos pyet i habitshëm  
Për itinerarin e zbritjes

Etjet edhe ashtu  
I përngjajnë kërpudhave të egra  
Mund të të mbysin  
Akoma pa e përjetuar forcën e fjalës

Atë çast të paharruar  
Kur binte ai shi i çmendur  
Ti ishe i padurueshëm  
I shikoje si një njeri i verbër  
Stërkalat e gjymtuara

Habitshëm shikoje  
Kah zbritnin nga shpirti i etjes  
I shikoje dhe qeshje  
Thua se çdo pikë shiu  
Buronte  
Nga egoja e jote e papërmirësueshme

2

Ne nuk deshëm asnjëherë  
T'i ndalim buzëqeshjet e gjelbërimit  
Bari i thatë i përngjante  
Stepës së egër

Në vrapin e dehur të një kaprolli  
E pamë eklipsin e hënës  
Se si i përjetonte  
Ikjet e zogjve rebel

Dielli i përskuqur qante atë ditë  
Si një pegun i lënë peng gjarprit me zile  
Qante edhe pellgu i kujtimeve  
Përmbytja ishte e pashmangshme  
Në degët e thyera të rrapit

## MUSHKONJAT

Kur betohemi  
I vëmë këmbët tona të rrejshme  
Në rropullitë e zjarrit  
Saçi i përskuqur buzëqesh  
Me një ironi tinëzare

Pasi që humbim në mendimet personale  
I zgjasim duart kah e ardhmja  
Sepse të kaluarën e kemi futur  
Në ingranazhet e oksiduara  
Të një tjetër kohe të trilluar

Nën një presion të paparë shpirtëror  
Këndojmë nën dush  
Serenatën e një mbrëmjeje  
Daullet e mërzitshme të lagjes  
Për çdo ditë  
Bien vetëm për të tjerët kur ikën era

Një kohë të gjatë  
Nën çatinë e vjetër duruam  
Atë muzikë të rrejshme të shiut  
Mushkonjat e infektuara  
Nga një sëmundje e re  
Pa hezitim sulmuan prejardhjen tonë

## NGA THASËT E DHIRTË

Kur nuk jemi në gjendje  
Të bëjmë diçka tjetër të vlefshme  
I mbërthejmë fjalët tona  
Për dizgjinët e kalit të egër

Më pastaj qeshim  
Qeshim derisa na shqyhen buzët  
Nën orën e vjetër të qytetit  
Me një shkop metalik  
I ngacmojmë akrepat e orës së ndalur

Dielli lëviz më ngadalë se zakonisht  
Ingranazhet e orës së diellit  
Tmerrshëm kërcasin  
Si kërcëllimat e një arabaje  
Ngarkuar me tragjedi të vjetra

Nga thasët e dhirtë  
Në kokën e një gjarpri të zi  
Mbinë një lule e çuditshme  
Ngjyra e së cilës i përngjan shiut  
Dhe bukës së arave tona  
Me sinor të kafshuar  
Diku në horizont dëgjohen gjëmat e buajve





*Ndjekësit e enigmave*  
*Cikli i dytë*



## ZËRI YT

Zëri yt i but si një copë mjegulle  
Që udhëton për në parajsë  
Ka një shije molle të pjekur

Zëri yt si zëri i erës  
Kur takohet me murrllanin  
Vrapon udhëve të fëmijërisë

Një hënë në eklips  
Fshihet pas ëndrrës së diellit  
Yjet pagjumë vrapojnë hapësirave

Do të ngarendim sonte shtigjeve të bardha  
Dhe nën hapat e kaprollit të egër  
Do i zgjojmë milingonat e fjetura

## KURSE ATO TË FUNDIT

Ecjet tona  
I përngjanin trajtës së shiut  
Sa herë që i kaluam udhët e gjata  
Para nesh dilnin  
Disa lloje zogjsh shtegtarë

I kapërcyem shtigjet e pa kaluara  
Me një hap të vetëm  
I shkelëm yllësit më të largëta  
Para nesh si nga dheu  
Mbinë në njëmijë ngjyra llojet e legjendave

Sa herë që deshëm të ikim  
Na ndalte një dorë prej mjegulle  
Për ta kapërcyer të pamundurën  
U bëmë zogj prej yjeve  
Dhe ikëm tejpërtejmes

Nënat tona përherë na bekuan  
Fjalët e para na mësoi atdheu  
Kurse ato të fundit  
I mësuam nga trishtimi i jetës

## KY XHAM

Ky xham mbi njëqind vjet  
Qëndron këtu i ngjyrosur  
Me vitrazhet e ylberit  
Dhe me shijen e portokalltë të atdheut tim

Sa herë që pat dyndje ushtarësh  
Me kryqe të tërbuara  
Gjeneralët i mashtruam  
Me nga një pulë të ngordhur

Kur u takuam me fundin e udhës  
Ky xham prej mishi  
I përbuzi pafundësisht  
Të gjitha pasqyrat e botës

Dhe në fund të fundit  
Ngadhënjeu mbi çdo vdekje  
Ky xham i kristaltë prej mishi  
Sa shumë po i përngjan  
Qëndresës së gjyshërve tanë

## **PREJ NJË FJALE TË VOGËL**

Fjalët nuk mbesin boshe  
Ato edhe kur nuk kanë se çfarë të bëjnë  
Kompozohen prej dhembjeve  
I përngjajnë patave të egra  
Ose korbave endacak  
Dhe kurrë nuk i ndalin krakëllimat

Prej një fjale të vogël  
Shumë të vockël  
Ngjashëm me milingonën  
Lindin gabimet e mëdha  
Si bishat  
Sa që askush në këtë botë  
Nuk është në gjendje ta kontrolloj  
Çmendjen e dallgëve të përroit

Nuk di athua lindi fjala para njeriut  
Ose njeriu para formimit të fjalës  
Mbase që të dy lindën njëkohësisht  
Fjala dhe njeriu  
I mbetën armiq njëri - tjetrit  
Deri në asgjësim

## SA HERË QË E PËRQAFOJ ERËN

Athua jam ose nuk jam më unë  
Ku ta kërkoj vetveten dhe pasqyrën e ujit  
Këto duar prej rëre  
Po i përngjajnë ëndrrave të fëmijërisë

Asnjë përrallë nuk tregohet sonte  
Kush po fshihet  
Gozhduar në lagështin e murrit  
Pas portretit të Lizës  
Mos jam vallë unë ai njeri atje  
Që është duke i matur rrugët

Një hije prej njeriu të mishtë  
Po na kalon parasysh  
Dhe tjetra vjen  
Kush e di se nga cila udhë është nisur

Kah janë duke ikur  
Zogjtë e fundit të atdheut tim  
Të kujt janë këto lutje shpendësh  
Që po qajnë te kryqet

Ju lutem më tregoni kush jam unë  
Të kujt janë këto duar të metalta  
Sa herë që e përqafojnë erën  
Ajo shndërrohet në mjegulla të kristalta

## IM ATË

Im atë i ndjerë  
Mbase ishte pa sy  
Sa herë që e shikonte diellin  
I kujtohej Homeri  
Këndonte me një lahutë të verbër  
Edhe rapsoditë i kishte të verbëta

Skajshmëria e verbësisë dallohej  
Vetëm kur qante mes dy kohërave  
Zëri i tij prej basi i përngjante  
Hukamës së erës  
Dhe syve të një njeriut  
I cili e kalonte detin  
Vetëm me sandale të kuqe

Im atë  
Sa herë që matej me vetëtimat  
Përpara këmbëve të tij kryeneçe  
Gjunjëzoheshin mbretërit  
Dhe perëndit  
Më krenar të Olimp  
Po të mos ishte i verbër  
Plaku im sykaltër  
Me siguri do i përngjante Zotave  
*Prishtinë, 06 korrik 2013*



## TE KAMBANORJA

Në pluhurin e mëngjesit  
Një zog rebel  
I lante krahët e plagosura  
Nga sqepi i thyer i fluturimit  
Si trishtim i një jete  
Çurgonte dita

Zogu dhe lisi  
Si një duet i tmerrshëm antik  
Hynë në teatrin e mendimit  
Çfarë roli do luaj sonte  
Kjo degë e thyer  
E gjuhës sime të vjetër

Një zog rebel iku hapësirave  
Pluhuri i një qiriu  
I ndezi të gjitha dritat e botës

Njerëzit e mirë  
U gjunjëzuan si asnjëherë më parë  
Te kambanorja e qytetit  
Një zog i bardhë  
Papandehur doli  
Nga lëvozhga e lënduar e erës

## KUAJT E DEHUR TË LUFTËS

Sa herë që biem ngushtë  
Na kujtohen psalmet e kënduara  
Dhe ato balada të tjera  
Që s'janë dëgjuar asnjëherë

Nëse rastësisht hija e jonë e verdhë  
Vetmon te shirat  
Ku mund t'i kërkojmë duart e lagura prej  
lotëve të një mjellme të ikur

Sonte zogjtë s'patën kohë të këndojnë  
Asnjë serenatë të trishtuar  
Në pluhurin e harrimit  
Dëgjohen si meloditë e fundosura  
Krakëllimat e disa arkivoleve

Më duket se ishte koha e meteorëve  
Nëpër vranësirën e qiellit  
Si hije dukeshin valëviteshin  
Këmishët e grisura të yjeve

Mbase nuk kishte mbetur asnjë pikë loti  
Në shuplakat e djegura të lëndinës  
Kujt e dehur të luftës  
Ethshëm pinin etjen e trishtimit

## **TI MOS HARRO**

Nëse vdes miku im  
Ti mos hezito të këndosh  
Sepse diku në shkrepat e atdheut  
Më pret një pemë e vjetër

Me mua do vijnë edhe shirat  
Unë asnjëherë në jetë  
Nuk i kam mbyllur portat  
Një zë prej baritoni  
Më thërret nga lashtësia

Unë do vij miku im  
Ose do shkoj te pema ime e egër  
Ti mos harro të këndosh  
Psalmet tona të pa kënduara

## POETËT

(Kushtuar poetit Fatmir Terziu)

Poetët janë në gjendje  
Të flenë me hënën kur ajo ekzaltohet  
Kurse të nesërmen pendohen  
Dhe zgjohen me lugetër

Sa herë që u teket  
Shndërrohen në kryengritës  
E kur zbresin majave  
Nga furtuna e shpirtit  
Sa ora bëhen  
Dashnorë tejet delikat

Herë janë burra  
Që për një fjalë goje  
Hi e pluhur bëhen për atdheun  
E herë fëmijë të pafajshëm  
Qe qajnë te fustanet e grave lozonjare

Poetët janë perëndi të përkryer  
Që vijnë nga lashtësia  
Por askurrë Zotave të Olimp  
Nuk i mbajtën të ndezura qirinjtë  
Këta jeniçer të fjalës  
Sa ora  
I përmbysën kazanët

## **NJË HËNË PAKËZ MË NDRYSHE**

Rrimë dhe shikojmë duke bërë seri  
Se si një pjesë e përskuqur  
E diellit skizofren  
Transformohet në një copë akulli

Duart e lagura të një libri  
Ngjyejnë në dhembjen e mjegullave  
Një furtunë prej ere  
Po i thyen degët shtrembëruara të natës

Shirat kanë filluar të zbresin  
Nëpër disa rrugë alternative  
Të reve blu  
Jashtëtokësorët në grevë urie  
Kafshojnë lëvoren e ajrit të tymosur

Kjo metamorfozë e dyshimtë  
Ka filluar të zgërdheshet  
Nga buzët e çezmës rrjedhin  
Prekjet e panumërta të shirave  
Një hënë pakëz më ndryshe  
Se ajo ekzistuese  
Po i mëkon mushkonjat vdekjeprurëse

## **NDJEKËSIT E ENIGMAVE**

Si statuja të zgjuara sfinksi  
Na dolën disa lloje labirintesh  
Hymë në enigmën e kashelashave  
Na kafshuan legjendat

Kudo na përcillnin përrallat  
Për një fjalë goje  
U bëmë shpirtra të mermerta  
Disa lloje gurësh të murrmë  
Na i thyen për kokën tonë  
Ndjekësit e enigmave

Kur u pamë te librat e vjetër  
Në maja malesh  
Për herë të parë u fishkën  
Shpirtrat e drurëve halor

Një kafshë e madhe  
Hyri në shpirtin e njeriut  
Dhe kurrë më  
Nuk doli ballëhapur në rrugë

## KRYQET E NGULURA NË TOKË

Më pritni edhe pak  
Ndoshta nesër është koha  
Të kërkoj falje prej të gjithëve  
Nuk isha engjëll  
Ama shumë larg isha edhe prej djallit të zi

Më kujtohen ditët  
Kur në çdo të dytin hap  
I bëja nga shtatë gabime  
I tillë kisha lindur  
Kryeneç si shkëmbi i stralltë

Pata edhe ditë të vështira në jetë  
Por ato ishin si ingranazhet e ndryshkura  
I dëgjoja serenatat  
E netëve të trishtë të Ballkanit  
Kur qanin gratë  
Pranë arkivoleve të ushtarëve

Si sot më kujtohen  
Kryqet e ngulura në tokë  
Për të mbërri deri te rruga e golgotës  
Duhej kaluar nëpër ferrin  
E çafkave të egra  
Duhej kaluar urrejtja e njeriut  
Ndaj një njeriu tjetër

## NGA NJË KËNGË E SAJ

Më duket se  
Kur ishim të vegjël  
Edhe dëshirat i kishim të vogla  
Pa kurrfarë brenga për të nesërmen  
Vraponim zbathur luadheve

Nuk na u dhimbseshin opingat  
Kur i shqyenim duke lozur top këmbë  
Lëkurë lopësh  
Kishim me bollëk në fshatin tonë

Mbase kështu mësuam të jetojmë  
Me këmishët e arnuara të pritjeve  
Sa herë që i harronim trastat korijeve  
Lopa e jonë e madhe jepte qumësht  
Për tërë fshatin e braktisur nga ikja

Mëngjeseve të hershme  
Kur zgjoheshin ullukët  
Ne pikonim tok me shiun e vjeshtës  
Pikonim ashtu të vetmuar  
Në vendin tonë u bëmë  
Asket prej mishi  
Dhe asnjëherë nuk u rritëm sa duhet



Nëna plakë ishte një zonjë  
Shumë e rënd  
Sa herë që e milte hënën  
I këndonte asaj disa lloje ninullash  
Nga një ninullë e lashtë  
Shiu i pranverës pa u ndalur askurrë  
Derdhej fushave të bardha

## AJO

Ajo ishte një grua delikate  
Qante si një lule  
Sa herë që binte shi  
Në vazon e kristaltë të erës  
Çelnin gonxhe pranverat e një shekulli

Ajo herë qante e herë qeshte  
Me ndryshimet atmosferike  
Tërë kohën i ushqente zogjtë e uritur  
Dhe me kujtesën e saj  
Ishte në gjendje t'i zgjoj nga gjumi  
Të gjitha baladat e fjetura

Ajo ishte në gjendje ta end  
Pëlhurën e rebelimit  
Ashtu siç end merimanga  
Rrjetin e rrathëve të zeza  
Për ta zënë në kurth  
Dritën e cila vuante nga lia e kuqe

Me etjen e kaktusit bisedonte hëna  
Me lotët e meteorëve endacak  
Qante qielli  
Qante edhe ajo me ngashërim  
Ky duet i paparë me qindra vjet jetoi  
Nëpër teatrot më të mëdha të shekullit

## DETI I TRAZUAR I SHPIRTIT

Kur nuk keni se çfarë të bëni  
Me duart e juaja të mbërthyer  
Për vegimin e hijes  
Prekni shpirtin e një peme  
Te e cila mugullon molla e ndaluar  
Ku lexohen epitafet e një stine

Nuk di a jeni në gjendje  
T'i vëreni këto rrudha që peshojnë  
Sa një jetë qeni  
Në rrugën e pakthyeshme të mëkatit

Nga ëndrra ime e trentë  
Zbritën kalorësit e një kohe  
Dhe kurrë më  
Nuk pata mundësi t'i shalojnë  
Dizgjinët e këputur të erës

Sa herë që dyshova në prejardhjen e ujit  
Përjetova përmytjen e deteve  
Një varkë diku në kujtesë  
I shëron plagët e peshkatarëve  
Deti i trazuar i shpirtit  
Akoma ëndërron të mbyturit e Titanikut

## NUK MË BESON ASKUSH

Nuk më beson askush  
Por unë për çdo ditë trokas  
Çmendurisht trokas në dyert e mendjes

Kur ndalem përpara pasqyrës  
I trokas edhe mikut tim të dehur  
Ai diku në një mur të tejdukshëm  
Ëndërron se si është ulur  
Në fronin e imagjinatës

Unë i kapërcej të gjitha shtigjet e durimit  
Por më besoni or miq  
Nuk mund të kaloj këndeje pari  
E mos ta shkallmoj deri në palcë  
Atë pasqyre konkave te të çarat e murit

Nuk më beson askush  
Por gjërat në këtë qytet të nakatosur  
Asnjëherë nuk kanë pasur emra  
Edhe vetë njerëzit s'dinë se si quhen

Çdo gjë këtu përbirohet si hija  
Nëpër plasat e dyshemesë  
Dhe si milingonat e zeza  
I ushqejnë premtimet e kota

*Prishtinë, 07 gusht 2013*

## **KËTO ITINERARE TË DYSHIMTA**

Mbrëmë një kohë të gjatë  
Luftova me vetveten  
I pyeta disa njerëz të panjohur  
Por asnjëri nuk e dinte emrin e vet  
Mbase ishin silueta të padukshme  
Që rrëshqitnin drejtë një honi në pasqyrë

Kur i dëgjuam lehjet e qenve  
Na u duk se këto ulërima  
Njerëzish të pafajshëm  
Zbritnin nga një galaktikë  
Ende të pazbuluar  
Këto itinerare të dyshimta  
Të erës  
Frynin pa mëshirë  
Në shpirtrat e pemëve të lënduara

Ecëm edhe një kohë të gjatë  
Atje përtej mendimeve tona  
Flinin zogjtë e një tjetër bote  
Mu ata zogj  
Që i hanë krahët e veta  
Etja ishte e madhe atë çast  
Sa që u përmbytën të gjitha varret  
Në brendinë e arkivoleve

## **SE SA TË JESH I HUAJI**

Në të katër anët e botës  
Me shekuj isha refugjatë  
Por më besoni  
O të dashurit e mi  
Nuk ka trishtim më të madh  
Se sa të jesh i huaj  
Në shpirtin tënd të vetmuar

## **PËSHPËRISTE EDHE ERA**

Sot herët në mëngjes  
Ajo i pëshpëriti përroit  
Disa fjalë sekrete  
Dhe si një hije e zbehtë  
Iku dhe u ngjizë te hija e saj

Në veshin e djathtë të barit  
Qante jehona e gjelbërimit  
Ajo iku ashtu siç ikin  
Fluturat  
Prej qirinjve të ndezur

Unë pashë edhe një pamje tjetër  
Se si rrëqethej gjelbërimi  
Në lotin e vesës  
Kurse ikja e saj i përngjante  
Ikjes së një pëllumbi të egër

Në përparësen e luadhit të pakositur  
Qante era në përmasa detesh  
Në korin e bretkosave  
Këndonte edhe një bilbil i vetmuar

Sërish pëshpëritja e njëjtë monotone  
Pëshpëriste edhe era  
Mbas dyzetë vjetëve kuptova  
Fshehtësinë  
E atij mëngjesi të dikurshëm  
Kuptova  
Se për hir të asaj nate  
Ajo më kishte krahasuar  
Me kalin e paçjerrë të furtunave



## NE ISHIM AQ TË VEGJËL

Po që se i afrohemi fundit  
Mos harroni se fjala  
Del përpara çdo vegimi  
Dhe këndon me mallëngjim  
Psalmet e përsëritura  
Kush e di se për të satën herë

Më kujtohet fare mirë më kujtohet  
Kur ishte mesha e madhe  
Ne ishim aq të vegjël  
Sa që humbëm vetveten  
Mes kokrrave të pluhurit  
Një zë baritoni vinte nga kambana  
Mbase atë çast  
Këndonte vetëm era

Ikën edhe stinët si njerëzit  
Kjo dyndje zogjsh të egra  
Nëpër kujtesën e lumit  
Nuk paska të ndalur

Te rrapit i kallur ende këndojnë qyqet  
Një elegji e trishtë  
Shkundet  
Nga degët e vjeshtës së pasosur

*Prishtinë, 08 korrik 2013*

## ORA E DIELLIT TË KRISTALTË

Në çdo kohë  
Ne jemi duke vdekur nga pak  
Frymëmarrja e pluhurit konvertohet  
Në uragan dhe na përpinë  
Si gllënjken e verës në Betlehem

Nëse vazhdojmë kështu ta matim kohën  
Ora e diellit të kristaltë  
Do të mbetet pa asnjë akrep  
Në qepallat e zogjve endacak  
Sërish këputen telat e një serenate

Më duket se ishte e kot thirrja ime  
Zambakët e Prizrenit  
Ndryshuan rrjedhën e Lumëbardhit  
Një grusht ujë të kulluar  
Nga mjegullat e maleve  
Ishte nisur në një rrugë të gjatë

Shkuan edhe zogjtë e vendlindjes sime  
Nuk mbeti asnjë përrallë  
Pa u treguar fëmijëve  
Dikur vonë  
Kur u kthyen dasmorët  
Atdheu i kishte shtruar për herë të parë  
Sofrat e dashurisë

## **PO DËNES NJË FËMIJË**

Me gjasë  
Ëndrrat më paskan mbetur  
Të sfilitura diku në shkrepat e atdheut  
Kot jam duke ëndërruar ca ëndrra të reja  
Vetmia e pudrosur me mall  
Vajton në një mol të harruar

Nuk është hera e parë  
Që e kthej kokën pas  
Me qindra herë  
I kam lënë sytë  
Te rrugët e grisura të fëmijërisë  
Dhe ja sot  
Si dielli i verbër loton hija ime

Loton edhe një shpirt i braktisur  
Asnjë zog i atdheut tim  
Nuk fluturon këndeje pari  
Ky metropol vrasës  
Kohë pas kohe  
Është duke na i kafshuar eshtrat  
Që thahen në erë  
Dhe si shpirti i burgosur në liri  
Po dënes një fëmijë

## BURRAT E DHEUT

Isha ishe ishim  
Dhe do të jemi denbabaden  
Klithma të një guri  
Që me shekuj lëshoi gjëmë  
Në shpirtin e kësaj toke mëmë

Kur na mbërthyen të na i kafshojnë  
Ëndrrat e zgjuara  
Në shpirtrat tanë jehuan zërat gjyshërve  
Një kobure e pruar  
Si nga baladat doli në Londër

Drita e lirisë veç këndonte maleve  
Si një zog i shenjtë  
Në zemrën e një burri  
Fluturonte udhëve të historisë

Një nënë plakë  
I zgjoi ëndrrat e fjetura  
Atdheu im  
Kurrë më nuk i mbylli sytë

Si kaprojtë e Bjeshkëve të Nemuna  
Dolën zanat e mira te kori jet  
Nga shpirti i pavdekshëm  
I legjendave shqiptare  
Zbritën gjelbërimit të paanë  
Burrat e dheut  
Që më shumë se jetën e deshën lirinë

## **MBI NJË GUR TË MURRMË**

Si një engjëll ti vjen në ëndrrën time  
Me zërin tënd kumbues  
Ecën mes baladave të një enigme  
Nën qerpikët e reve  
I fsheh me xheloz  
Shirat e një vjeshte të irnosur

Shikoj me mallëngjim zbritjen e yjeve  
Me ngashërim i përcjelli  
Ikjet e zogjve  
Asnjë flutur e larme  
Nuk ndalet te lulet e mollës së çelur

Një arkivol ngjyrë are  
Me ditë të tëra qante te varret  
Vetëm një kryq i huazuar  
Bisedon me trishtim  
Për rrugën e gjatë të golgotës

Mbi një gur të murrmë  
Dënesje vashash të virgjëra  
Lisi i prerë në shtatë pjesë  
Shtatë herë gjëmoi  
Nën vrapin e çmendur të një patkoi

## **NJË SHI IMCAK**

Si sot më kujtohet dora e jote  
Si e bardha e kristaltë e borës  
Dhe flladi i vjeshtës së ngrirë  
Në përkundjen e djepit  
Pikonte stina e plagosur

Një zonjë e moshuar  
Kush e di se sa vite i kishte shkelur  
Mosha e saj fatlume  
Me një elegancë të paparë  
I mëkonte meteorët e këputur

Te mollët e njoma  
Një çift i ri këputnin kujtimet e një kohe  
Dhe qeshnin si luledielli në verë  
Dielli i dashuruar  
Mbase shkëlqente për tërë botën

Isha shumë i hutuar  
Vetëm duart e mia të akullta  
Bisedonin me flokët e shprishura të erës  
Një shi imcak  
I përngjante fjalëve të ftohta të borës  
Dhe tërë kohën i shqelmonte  
Qepenat e mbyllura të dyqaneve

## SI NË DEGË NJË MOLLË

Pse pohoni që një gjarpër  
Përherë fle nën mollë  
Jo ,jo aty është një vashë  
Zonjë e rënd elegante  
Si selvi e hollë

Në çdo vend të botës  
Njeriu e do mallkimin  
Gjatë tërë ditës së lume  
Sterrën e shikon  
Dhe në mbrëmje vonë  
Fle me trishtimin

Ajo e gjatë e bukur  
Dhe e hollë  
Për çdo ditë si fjala  
Piqet nga pak  
Si në degë një mollë



## TROKIT NËSE DUHET

Nëse nuk t'i hap portat  
Ti sërish trokit te yjet  
Që ty dy ju  
I keni borxh njëri - tjetrit

Për një fjalë goje  
Mos u konvertoni në bisha të mëdha  
E as në djaj të zinj  
Dashuria kërkon më shumë se sakrificë

Trokit nëse duhet  
Edhe në portat e çelikta të Ferrit  
Por kurrësi mos harro  
Të trokasësh te dyert e atdheut

Sa herë që të zihet fryma  
Ai sa ora  
Të bëhet frymëmarrja e jote  
Atdheu është gjaku dhe shpirti i shpirtit

Trokit e mos u ndal askurrë  
“Sa e do ti  
Po aq edhe atdheu të do ty”  
Trokit edhe në portat e qiellit  
Do hapen një ditë  
Si arkapitë e mbyllura të fjalëve



*Kishte trajtën e një njeriu*  
*Cikli i tretë*



## HINGËLLONIN KUAJT E ETUR

Si pa kokë hyra  
Mes vargjeve të një libri të vjetër  
Askund asnjë njeri  
Vetëm një kafshë e madhe  
Deri në asht e përtypte ditën

Si lehje qensh dëgjoheshin ca zëra  
Nga palca e nëntokës  
Galoponin ndjekësit e enigmave  
Dielli nuk dukej askund  
Një hënë e venitur qante te mjegullat

Nuk më besohet se aq e frikshme  
Mund të ishte dita  
Nga krifat e bardha të një kali  
Shkundej trishtimi i një beteje  
E lufta nuk kishte ndërmend të përfundoj

Deri në bark të kuajve të luftës  
Notonte një shalë në gjakun shumëngjyrësh  
Hingëllonin kuajt e etur  
Hingëllonte beteja e papërfunduar  
Një vashë me një testi të mbushur me lot  
Shuante zjarrin e betejës

*Prishtinë , 09 korrik 2013*

## THEMI SE ISHIM

Nuk di më se kush jemi sot  
Kush ishim dje  
Dhe kush do të jemi nesër  
Themi se ishim  
Pasardhësit më krenar  
Të një shiu të kristaltë

Me mija vjet ndoshta edhe më shumë  
Ecëm deri te golgota  
Një kryq i ngulur te varret  
Asnjëherë nuk i ndali thirrjet  
Thërriste të pamundurën mes gurëve të etur

Ne i besuam vrapit të kalit të egër  
Vrapuam me shekuj  
Pa u ndalur pas dizgjinëve të frikës  
E frika ikte  
Ikte edhe era me kuajt e drunjtë

Një boshllëk të paparë nën dangën e gurit  
Ndjente lëkura ime  
Nuk lahen njollat e kuqe të vesës  
Me këtë shi të hollë pranvere  
Gjethet filluan të mbajnë zi  
Me ngashërim të paparë dënësën degët

## ZOTIN NUK E GJUAJTA ME GUR

Shikoni se si paskam mbetur sot  
Bredhin hapat e mia të sfilitur  
Nëpër trotuaret e metropolit  
Eci si një somnambul  
Pa asnjë lek në xhep

Sa e largët  
Më duket kafeja në duart e kamerierit  
E largët si atdheu im  
Një njeri më shikon  
Si bishën e zënë në kafaz  
Dhe zgërdheshet me vetveten

Një hap përtej asaj udhe  
Ndizen dritat e kuqe  
Seksi reklamohet nëpër vitrina  
Kalojnë njerëz me xhepa të shqyera  
Dhe ata me xhepa të thella

Kalëroj nëpër mendimet e mia  
Udhëve të pabrenga të fëmijërisë  
Dritat e neonit  
Ma ngacmojnë verbësinë e syve  
Ky qytet ëndrrash  
Më është bërë makthi im i fundit

2.

Ku të ulem  
Çfarë të bëj me këto eshtra  
Të moshuara  
Të shkoj deri në atdheun tim  
Nuk kam më fuqi e as mundësi

Zotin nuk e gjuajta me gur  
Asnjëherë  
Nuk di më o miq  
Ku do të më varrosin  
Nëse jo në atdheun tim  
Atëherë me siguri në këtë kontejner



## **E KUR TË TAKOHEN**

Ja kështu vdesin njerëzit  
Të heshtur  
Pa zë mbi një qivur

Një mur i plasaritur loton  
Kurse era si përherë  
Serenatën e saj këndon

Askush s'e di  
Athua është udhëtimi i parë  
Mbase i fundit as që ekziston

Kështu vdesin njerëzit  
Të mërrolur si retë  
Pa asnjë fjalë udhëtojnë drejtë ujit

E kur të takohen  
Me bigëzimet e një lumi  
Për herë të fundit sytë çelin trëndafila të zi

## I DREJTOJNË SYTË NGA QIELLI

Qyteti im  
Ka dhembje të fortë koke  
I gëlltit tabletat për qetësim  
Më së shumti e mendojnë  
Problemet e përditshmërisë  
Ngjan që fëmijët e tij të zgjohen të uritur

Ky qytet si çdo qytet tjetër  
Ka shumë halle me kanalizimin  
Kur rebelohen shirat  
Nëpër korridoret e shpirtit  
Furishëm derdhen ujërat e zeza

Një ditë zgjohet me muzikë  
Të mirëfilltë  
Kurse ditën tjetër  
Nën tingujt e trishtë të fanfarës

Këto marshime milingonash  
I trembin  
gjeneralët në gjumë  
Dhe këndesat nëpër kotece

2.

Ju thash pra  
Kur ka dhembje koke qyteti im  
Mashtrohet me aspirina  
Si fëmijët endacak me lëpiza  
Dhe më pastaj  
Kërkon ndihmë në urgjencë  
Ndjen nevojën e pastrimit të gjakut

Në qytetin tim  
Njerëzit kanë nga një gjysmë vdekje  
Sillen thua se janë plotësisht pagan  
Si perëndive të dehur të Olimp  
U besojnë matrapazëve

Kur mbesin me xhepa të zbrazura  
Instinktivisht  
I drejtojnë sytë kah qielli  
Dhe i luten në gjuhën e tyre pagane  
Deri në lot  
Një hyji të cilin askush nuk e njeh

## **KJO RRUGË E GJATË**

Brenda nesh si lulja  
Herë ëndërron  
E herë qohet peshë  
Një vrushkull gjaku

Kjo rrugë e gjatë  
Që shkon përtej amshimit  
S'kalohet për një natë  
Nëpër të çarat e trishtimit

ky udhëtim pa zë  
Po lëviz në ekran si një film i animuar  
Lëvizin edhe hijet e padukshme  
Pran nesh duke galopuar

## KISHTE TRAJTËN E NJË NJERIU

Si nëpër rrjetin e merimangës  
Hymë në gjumin e natës  
Nga shtambat e thyer të qiellit  
Derdhen përroit  
Ciflat e kristalta të yjeve

Një hënë te malet  
Mbi njëqind vjet qanë me qyqet  
Asnjë korb i zi  
Nuk mbeti në hapësirë  
Fluturuan xhadeve fluturat e ngrira

Me çfarë kënge i mëkuat meteorët  
Kur vraponin qiellit kuajt e egër  
Lufta përherë ishte te ne  
Shumë më e gjatë  
Se sa jeta e një qeni endacak

Një pjesë e erës te korijet  
Kishte trajtën e një njeriu  
Muzika mortore  
Nuk pushonte te varret  
Një kryq i varur po qanë si fëmijë

## **VJESHTA VEÇ KISHTE FILLUAR**

Prej një cope bryme  
Për herë të parë sajuam  
Një copë të ngrirë mjegulle  
Rosat e egra  
Ikën drejtë të panjohurës

Nga stërkalat e shiut  
Në horizontin e paanë  
Mbetën peng  
Dizgjinët këputur të një balade

Një vijë e hollë si gjuhë gjarpri  
Mbeti kujtim  
Te flokët e mjegullave

Agullima prite te portat  
Serenatën  
E një vjeshte të harruar

Ikjet e kuajve  
Ishin çastet e pashmangshme  
Vjeshta veç kishte filluar të loz  
Lojën delikate të gjetheve

## SI NJË KALORËS I DEHUR

Këto mbeturina po më duken  
Si skeletet e shirave të vdekur  
Kush i varrosi sandalet e kuqe  
Në ballinat e gazetave ditore  
Luajmë tangon e fundit të vjeshtës

Një fërfërimë e pa definuar  
Si një kalorës i dehur  
Vrapoi rrugëve  
Gjysmë të asfaltuara  
Në fund të lagjes së evgjitëve  
Dëgjohet kuisja e një qeni të zgjebosur

Mbase nuk ishte as fundi i tregimit  
Por mbarimi i një tragjedie  
Kjo pamje  
E mbeturinave luksoze  
Po m'i përkujton  
Zonjat e rënda me taka të gjata

Te xhamat e një vitrine  
Të thyer copë e grimë  
Ka ditë  
Që reklamohen filmat pornografik

Të moshuarit  
Mezi qëndrojnë në këmbët  
E tyre të drunjta  
I lëpijnë buzët e rrudhosura  
Si ato kokona të shtëpive  
Me ngjyra të kuqe



## DHE ADRESËN E SHTËPISË

Kur u nisa në kurbet  
Me vete e morra vetëm një valixhe  
Dhe adresë e shtëpisë  
Një tren i çmendur i shkeli  
Të gjitha rrugët e botës

Diku në fund të udhëtimit  
I shtypi në kokë edhe ëndrrat e mia  
Mbeta lakuriq rrugëve  
Si miu i bardhë  
Nën hambarët e Evropës

Stuhishëm kaluan  
Dhe ikën motet e pështira  
Asgjë nuk më ka mbetur në kujtesë  
Përpos hingëllimës së trenit  
Të prishur  
Me një valixhe pa adresë  
Dhe plaf të grisur

*Prishtinë, 10 korrik 2013*

## **NJË ZOG VAJTUES**

Ky shi që po bie sot  
Mbase askund nuk i gjendet fundi  
Megjithatë po bie  
Ashtu siç bien flokët e mi

Po kalojnë stinët e erës  
Dimri paska ardhur i zhveshur  
Më herët sivjet po shkundën pemët  
Nga gjymtyrët e rrënjëve binjake  
Pikojnë ditët

Një zog vajtues  
Është ulur mbi një degë  
Dhe bisedon me meteorët  
Ca rosa të egra  
Humbin mes mjegullave  
Lehjet e dimrit kurrsesi të pushojnë

Kjo shtrezë që po bie sot  
Me lotët e shiut imcak  
Po i mërdhinë zambakët gjysmë të vdekur  
Te kambanorja e rrënuar  
Po qanë si një foshnje  
Shiu i rreptë i një dimri

## TE MALET E NGRIRA

Nëse trokas mbrëmjeve të vona  
Hapni portat  
Jam unë hija e një nate  
Që ka humbur rrugën  
Mes gishtave të shiut

Erdha me dhembjen e dimrit  
Acari rrinte në qoshe të dhomës  
Dhe shfletonte një libër të vjetër  
Sërish dimri  
I humbi rrugët e bardhësive

Te malet e ngrira  
Po dëgjohen ca zëra bishash  
Qukapikët e zinj  
Po ua prishin gjumin krimbave  
Drunjtë halor ua shpojnë syt zogjsh  
Nëpër qiellin e zi  
Dëgjohen vetëm krakëllimat  
E yjeve endacak

## NUK NA I LAGI FLOKËT

Provo të lutem  
Nëse mund të ndezësh zjarrin  
Në mua  
Kaherë janë shqimur luspat e diellit

Ishte ajo kohë kur ecnim  
Mbi drurët e ndezur të fjalëve  
Dhe këndonim serenata  
Shiut të pranverës  
Kohët e meteorëve  
Kur binin në vjeshtë shirat

Megjithatë shtreza asnjëherë  
Nuk na i lagu flokët  
Deri në asht u zhytëm në kujtimet tona  
Dhe në fund të itinerarit  
I humbëm trenat  
Te një udhëtim të imagjinuar  
Pamë vetëm një pikëpyetje të madhe

Provo të lutem edhe njëherë  
T'i ndezësh flakadanët e rinisë  
Në qerpikët e këputura të natës  
Sonte është hera e parë në jetën time  
Që po ndjehem kaq i lumtur

## DITËT ISHIN MAKTH

Me shekuj  
Netët tanë ishin net qensh  
Ulërimat i dëgjuam edhe në ëndrra  
Ditët ishin makth  
E makthet trishtim prej tmerri

Ecëm nëpër një rrugë të zjarrtë  
Me shputa të djegura  
I shkelëm copat e gacave  
Dhembjet ishin të padurueshme  
Në dizgjinët e kuajve të vrrarë  
Sfiliteshin kufomat e njerëzve

Me shekuj ecëm si sfilitjet e shpirtrave  
Udhët ishin të stërzgjatura  
Deri në pafundësinë e një balade  
Shkonin edhe përtej ferrit  
Nëpër urën e shpirtit  
Të ngarkuar me gjëmë kalonte frika

Një nënë e shtyrë në moshë  
Në vend të dhembjeve  
Mbi shpatullat e saja të rrënuara  
Kalonte ngarkuar  
Me një kryq prej trishtimi

Qante era te lisat e prera  
Thua se nata  
Vetëm ajo sterrë e paparë  
Kuiste si qeni i sëmurë në stele

Me shekuj i përjetuam  
Netët e thikave  
Në ashtin e thyer të një kafke  
Me mall të pashuar po dënes  
Një hartë e grisur e atdheut tim

*Prishtinë, 11 korrik 2013*

## SHËNIME BIOGRAFIKE PËR AUTORIN

**Adem Zaplluzha** u lind në Prizren, më 1943. Shkollën fillore dhe të mesme i kreu në vendlindje, ndërsa Akademinë Pedagogjike në Prishtinë. Një kohë punoi si mësues nëpër fshatrat Studençan të Therandës (ish Suharekës) dhe Hoça e qytetit, afër Prizrenit. Ndërkohë punësohet si përkthyes në Korporatën Energjetike të Kosovës. Me shkrime filloi të merret kryesisht me poezi që nga mosha e fëmijërisë. Rugën letrare e nisi me vjershën e parë për fëmijë të cilën e botoi në revistën “Pionieri”, më 1957. Si i punësuar në Korporatën Energjetike të Kosovës bashkë me shokët e punës dhe pendës themeloi grupin letrar “Lulëkuqet e Kosovës”. Në Kuadër të punës së këtij grupi letrar qe botuar përmbledhja “Ngjyra e kohës”, në të cilën u përfshi një numër i konsideruar i poezive të tij. Krahas krijimeve të publikuara në revistat për fëmijë, botoi edhe një serë shkrimesh nëpër gazetatat e kohës që dilnin në Prishtinë dhe Shkup. Është anëtar i Lidhjes së shkrimtarëve të Kosovës, prezent në disa antologji dhe në librin Kosova letrare të poeteshës Monica Mureshan. Është prezantuar në *Leksikonin e Shkrimtarëve Shqiptarë 1501-1990*, nga Hasan Hasani, në *Leksikonin Shkrimtarët Shqiptarë për fëmijë 1872 - 1995* nga Odhise K. Grillo, si dhe në

librin *Portrete Shkrimtarësh* nga Demir Behluli, Prishtinë, 2002 Në maj të vitit 2013 Klubi i Artistëve dhe i shkrimtarëve të Durrësit ia ndau çmimin e karrierës për kontributin e dhënë në letrat shqipe. Jeton dhe krijon në Prishtinë ndërsa aktivitetin letrar e zhvillon në kuadrin e Klubit letrar “Fahri Fazliu”, në Kastriot.



## BOTIME TË AUTORIT

1. **“Puthje”, poezi**, “Rilindja”, Prishtinë, 1974.
2. **“Ecjet e viteve të mëdha”, poezi**, “Jeta e Re”, Prishtinë 1995.
3. **“Çamarrokët e Thepores”, poezi për fëmijë**, “Shkëndija”, Prishtinë 1996.
4. **“Muret”, poezi**, “Jeta e Re”, Prishtinë, 1997.
5. **“Morfologjia e dhembjes”, poezi**, “Faik Konica”, Prishtinë, 2000
6. **“Ai vjen nesër”, poezi**, Qendra e Kulturës, Klubi letrar “Fahri Fazliu”, Kastriot, 2007
7. **“Letër nga mërgimi”, poezi**, Klubi letrar “Fahri Fazliu” Kastriot, 2007
8. **“Letër nga mërgimi 2 “ poezi**, “Qendra e Kulturës”, Klubi letrar, “Fahri Fazliu”, Kastriot 2007
9. **“Udhëdarja”, poezi**, “Qendra e Kulturës”, Klubi letrar, “Fahri Fazliu”, Kastriot, 2008
10. **“Thirrje e gjakut”, poezi**, “Qendra e Kulturës”, Klubi letrar, “Fahri Fazliu” Kastriot 2008
11. **“Asgjë sikur molla”, poezi**, “Qendra e Kulturës”, Klubi letrar “Fahri Fazliu”, Kastriot, 2009.
12. **“Vesa në lotin tim”, poezi**, “Qendra e Kulturës”, Klubi letrar “Fahri Fazliu”, 2009,

13. **“Puthja e gozhduar”**, poezi, “Qendra e Kulturës”, Klubi letrar, “Fahri Fazliu”, Kastriot, 2009.
14. **“Kashelasha në vargje”**, poezi për fëmijë,” Qendra e kulturës, Kastriot, 2009.
15. **“Pema e bekuar”**, E përkthyer, Rumani, 2010.
16. “Bajraktarët e vatanit”, poezi satirike, Klubi letrar, ”Fahri Fazliu” Kastriot, 2010.
17. **“Hijet e ndryshkura”**, poezi,”Qendra e kulturës”, Kastriot,2010.
18. **”Stuhi në Kutulishte”**, poezi,”Qendra e kulturës”, Kastriot,2010.
19. **“Posa ikte nata”**, poezi, “Qendra e kulturës “, Kastriot,2010.
20. **“Loja e myshqeve”**, poezi,”Qendra e kulturës”, Kastriot,2010.
21. **”Lumëbardhi dhe gjëma”**, poezi,”Qendra e kulturës”,Kastriot, 2010
22. **“Metafora e heshtjes”**, poezi, “Qendra e kulturës”,Kastriot, 2010
23. **”Hyji në Prekaz”**, poezi,”Qendra e Kulturës”, Kastriot,2010.
24. **”Sinorët e hinore”**, poezi, Shoqata e Shkrimtarëve-Kastriot 2010
25. **”Don Kishoti dhe Rosinanti”**, poezi, Shoqata e Shkrimtarëve, Kastriot, 2010
26. **”Zjarri i dashurisë”**, poezi, Shoqata e Shkrimtarëve-Kastriot, 2010

27. **"Kur likenet vallëzojnë"**, poezi, Shoqata e shkrimtarëve-Kastriot, 2010
28. **"Ditari në vargje"**, poezi, Shoqata e Shkrimtarëve-Kastriot, 2010
29. **"Tingujt që nuk përfundojnë"**, poezi, Shoqata e shkrimtarëve –Kastriot, 2010.
30. **"Shtegu i mallit"**, poezi, Shoqata e shkrimtarëve-Kastriot, 2010
31. **"Korniza e thyer"**, Poezi, Shoqata e shkrimtarëve, -Kastriot, 2010
32. **"Zgjimi i gjëmës"**, Poezi, Shoqata e Shkrimtareve-Kastriot, 2010
33. **"Vallja mistike"**, Poezi, Shoqata e Shkrimtarëve- Kastriot, 2010
34. **"Merre kodin"**, Poezi për fëmijë, Shoqata e shkrimtarëve Kastriot, 2011
35. **"Letër atdheut"** poezi, Shoqata e Shkrimtarëve-Kastriot, 2011
36. **"Tejdukshmëria e shiut"**, Poezi, Shoqata e Shkrimtarëve- Kastriot, 2011
37. **"Përtej teje"**, poezi, Shoqata e Shkrimtarëve-Kastriot, 2011
38. **"Sa afër e sa larg"** , poezi, Shoqata e shkrimtarëve-Kastriot, 2011
39. **"Vallja e zanoreve"**, Poezi , Shoqata e Shkrimtarëve- Kastriot, 2011

40. **“Ikja e eshtrave”**, Poezi për të rritur, Shoqata e Shkrimtarëve- Kastriot, 2011
41. **“Kalorësit e mjegullave”**, Poezi, Shoqata e shkrimtarëve-Kastriot, 2012
42. **“Hingëllimat e shiut”**, Poezi, Shoqata e Shkrimtarëve- Kastriot 2012
43. **“Kur pemët i ndërrojnë këmishët”**. Poezi, Shoqata e Shkrimtarëve- Kastriot, 2012
44. **“Mirëmëngjes Imzot”**, Poezi, Shoqata e shkrimtarëve – Kastriot, 2012
45. **“Kafshimi i mikut”**, Poezi satirike, Shoqata e Shkrimtarëve- Kastriot, 2012
46. **“Atje tej maleve”**, Poezi, Shoqata e shkrimtarëve , Kastriot-2012
47. **“Heshtja që del në shesh,”** Poezi, Shoqata e Shkrimtarëve, Kastriot -2012
48. **“Portat e shpresës”**, Poezi, Shoqata e shkrimtarëve, Kastriot-2012
49. **“Në dhomën time gjysmë të errët”**, Poezi, Shoqata e Shkrimtarëve- Kastriot, 2012
50. **“Kinse Lojë Shahu”**, Poezi, Shoqata e Shkrimtarëve- Kastriot, 2012
51. **“ Për çdo dekadë nga një baladë “**, Poezi, Shoqata e Shkrimtarëve – Kastriot, 2012
52. **“Fusha e mëllenjave”**, Poezi, Shoqata e shkrimtarëve- Kastriot, 2012
53. **“E kujt është kjo vetmi”**, Poezi, Shoqate e Shkrimtarëve- Kastriot, 2012

54. **“Mos pyet për adresën e lumit”**, Poezi, Shoqata e Shkrimtarëve – Kastriot, 2012
55. **“Stoli në parkun vjetër”** Poezi, Shoqata e Shkrimtarëve- Kastriot, 2012
56. **“Urori i stralltë”**, poezi, Shoqata e shkrimtarëve –Kastriot, 2012
57. **“Po të mos ishte fjala”**, Poezi, Shoqata e shkrimtarëve- Kastriot, 2012
58. **“Thyerja e urave”**, poezi, Shoqata e shkrimtarëve –Kastriot, 2012
59. **“Trokëllimat në gjumin e dallgëve”**, Poezi, Shoqata e Shkrimtarëve- Kastriot, 2012
60. **“Në flokët e dëborës”**, poezi, Shoqata e Shkrimtarëve –Kastriot, 2012
61. **“Një grusht nostalgji”**, Poezi, Shoqata e Shkrimtarëve-Kastriot, 2012
62. **“Kur filluan të flasin njerëzit”**, poezi, Shoqata e shkrimtarëve- Kastriot, 2012
63. **“Kur stinët kapërcejnë fshehurazi”**, poezi, Shoqata e Shkrimtarëve – Kastriot, 2012
64. **“Lisi në rrënjët e veta”**, Poezi, Shoqata e Shkrimtarëve –Kastriot 2012
65. **“Eca ecëm dhe do ecim”**, Poezi, Shoqata e Shkrimtarëve – Kastriot, 2012
66. **“Fëmijët e erës”**, Poezi, Shoqata e shkrimtarëve-Kastriot 2012
67. **“Çast në fund të stinës”**, Poezi, Shoqata e Shkrimtarëve- Kastriot-2012

68. **“Si të flas me drurët”**, Poezi, Shoqata e Shkrimtarëve-Kastriot, 2012
- 69, **“ Më pëlqejnë mendimet e tua”**, Poezi, Shoqata e Shkrimtarëve- Kastriot , 2012
70. **”Andej dhe këndej kohës”**, poezi, Shoqata e Shkrimtarëve- Kastriot , 2012
71. **“Zëri i heshtjes”**, poezi, Shoqata e Shkrimtarëve- Kastriot, 2012
72. **“Kush i lexoi letrat prej erës”**, poezi, Shoqata e Shkrimtarëve-Kastriot, 2012
73. **“ Fluturimi i korbave në netët pa hënë”**, prozë poetike, Shoqata e Shkrimtarëve –Kastriot, 2012
74. **“Koha e ime dhe koha e jote”**, Poezi, Shoqata e Shkrimtarëve-Kastriot , 2012
- 75.” **Diku te një baladë”**, Poezi, Shoqate e Shkrimtarëve –Kastriot, 2012
76. **“ Sonte çdo gjë po i përngjan lotëve”**,Poezi, Shoqata e Shkrimtarëve –Kastriot, 2012
- 77 **“ Ky def prej hëne”**, Poezi, Shoqata e Shkrimtarëve-Kastriot, 2012
- 78.**“Pyesni zogjtë në ikje ”**,Poezi , Shtëpia botuese “Fahri Fazliu”- Kastriot 2013
- 79 **“ Fërfërimë gjethesh”**, Poezi, Shtëpia botuese “Fahri Fazliu”, Kastriot- 2013
80. **“Refrene yjesh”**, Poezi, Shtëpia botuese “Fahri Fazliu”- Kastriot, 2013
81. **“Te delta e mjellmave”**, Poezi, Shtëpia botuese “Fahri Fazliu”, Kastriot- 2013

82. **“Rinjohja”**, Poezi, Shoqata e Shkrimtarëve  
“Fahri Fazliu”- Kastriot, 2013
83. **“Diku në fund të një fillimi”**, Poezi, Shoqata e  
Shkrimtarëve, “Fahri Fazliu”- Kastriot, 2013
84. **“Makthi i hijes”**, Poezi, Shoqata e  
Shkrimtarëve-“ Fahri Fazliu”Kastriot, 2013
85. **“Një zog prej uji”**, Poezi, Shoqata e  
Shkrimtarëve “Fahri Fazliu”- Kastriot
86. **“Asnjë fjalë nuk frymon”**, Poezi, Shoqata e  
Shkrimtarëve, “Fahri Fazliu”- Kastriot, 2013-
87. **“Daullet e një nate”**, Poezi, Shoqata e  
shkrimtarëve “Fahri Fazliu”-Kastriot 2013
88. **“Sytë e gurtë të erës”**, Poezi, Shoqata e  
Shkrimtarëve “Fahri Fazliu”- Kastriot, 2013
89. **“Fjetëm njëqind shekuj”**Prozë poetike,  
Shoqata e Shkrimtarëve “Fahri Fazliu”-Kastriot ,  
2013
90. **“Kur dehen perënditë”** , Poezi, Shoqata e  
Shkrimtarëve “Fahri Fazliu”-Kastriot -2013
91. **“Krakëllimat e natës”**,Poezi, Shoqata e  
shkrimtarëve “Fahri Fazliu”-Kastriot, 2013
92. **“Ndjekësit e enigmave”**, Poezi, Shoqata e  
Shkrimtarëve “Fahri Fazliu”-Kastriot -2013





## PËRMBAJTJA

<b>Ecën edhe yjet pas saj - Cikli i parë</b> .....	11
Ti qëndrove stoikisht .....	13
Degët u bën shpirtra pemësh .....	14
Ishte koha e fjalëve .....	15
Fol .....	16
2. ....	17
Një trëndafil i zi .....	18
Furtuna mbi një arkivol .....	20
Kujtove se ikja e kujtesës .....	22
Kur zbritën fluturat .....	23
Më pritni .....	24
Kur njerëzit i çelën sytë .....	25
Ky balsam shërues .....	26
Ecën edhe yjet pas saj .....	27
Unë dhe ti jemi ai .....	28
Ishte dita .....	29
Flinin si kuajt e luftës .....	30
Ti i përngjan pemës .....	32
Te fundi i betejës .....	33
Ky duet prej mjegullave .....	34
Si yjet e verdha .....	35
E pamë eklipsin e hënës .....	36
2. ....	37
Mushkonjat .....	38
Nga thasët e dhirtë .....	39
<b>Ndjekësit e enigmave - Cikli i dytë</b> .....	41
Zëri yt .....	43
Kurse ato të fundit .....	44
Ky xham .....	45
Prej një fjale të vogël .....	46

Sa herë që e përqafoj erën .....	47
Im atë .....	48
Te kambanorja .....	49
Kuajt e dehur të luftës .....	50
Ti mos harro .....	51
Poetët .....	52
Një hënë pakëz më ndryshe .....	53
Ndjekësit e enigmave .....	54
Kryqet e ngulura në tokë .....	55
Nga një këngë e saj .....	56
Ajo .....	58
Deti i trazuar i shpirtit .....	59
Nuk më beson askush .....	60
Këto itinerare të dyshimta .....	61
Se sa të jesh i huaji .....	62
Pëshpëriste edhe era .....	63
Ne ishim aq të vegjël .....	65
Ora e diellit të kristaltë .....	66
Po dënes një fëmijë .....	67
Burrat e dheut .....	68
Mbi një gur të murrme .....	70
Një shi imcak .....	71
Si në degë një mollë .....	72
Trokit nëse duash .....	73
<b>Kishte trajtën e një njeriu - Cikli i tretë</b> .....	75
Hingëllonin kuajt e egër .....	77
Themi se ishim .....	78
Zotin nuk e gjuajta me gur .....	79
2. ....	80
E kur të takohemi .....	81
I drejtojnë sytë kah qielli .....	82
2. ....	83

Kjo rrugë e gjatë .....	84
Kishte trajtën e një njeriu .....	85
Vjeshta veç kishte filluar .....	86
si një kalorës i dehur .....	87
Dhe adresën e shtëpisë .....	89
Një zog vajtues .....	90
Te malli i ngrirë .....	91
Nuk na i lagi flokët .....	92
Ditët ishin makth .....	93

Katalogimi në botim – (CIP)

Biblioteka Kombëtare dhe Universitare e Kosovës

821.18-1

Zaplluzha, Adem

Ndjekësit e enigmave / Adem Zaplluzha.

- Kastriot : Shtëpia botuese “ Fahri Fazliu”, 2014. -  
109 f. ; 21 cm.

Parathënie / Arsim Halili : f. 7-11. Adem Zaplluzha  
: f. 95-104

**ISBN 978-9951-664-07-3**